

॥ नक्षत्रसूक्तम् ॥

.. NakShatrasukta ..

sanskritdocuments.org

December 4, 2016

.. NakShatrasukta ..

॥ नक्षत्रसूक्तम् ॥

Sanskrit Document Information



Text title : nakshatrasuuktaM

File name : nakshatra.itx

Category : sUkta

Location : doc_veda

Author : Vedic Tradition

Language : Sanskrit

Subject : philosophy/hinduism

Transliterated by : Rajagopal Iyer (rajsand at yahoo.com)

Proofread by : Rajagopal Iyer (rajsand at yahoo.com)

Latest update : June 14, 2000

Send corrections to : Sanskrit@cheerful.com

Site access : <http://sanskritdocuments.org>

This text is prepared by volunteers and is to be used for personal study and research. The file is not to be copied or reposted without permission, for promotion of any website or individuals or for commercial purpose.

Please help to maintain respect for volunteer spirit.

December 4, 2016

sanskritdocuments.org

॥ नक्षत्रसूक्तम् ॥

तैत्तिरीय ब्रह्मणम् । अष्टकम् - ३ प्रश्नः १

तैत्तिरीय संहिता। काण्ड ३ प्रपाठकः - ५ अनुवाक -१

ॐ ॥ अग्निर्नः पातु कृत्तिकाः। नक्षत्रं देवमिन्द्रियम्।

इदमासां विचक्षणम्। हविरासं जुहोतन।

यस्य भान्ति रश्मयो यस्य केतवः। यस्येमा विश्वा भुवनानि सर्वा।

स कृत्तिकाभिरभिसंवसानः। अग्निर्नो देवस्सुविते दधातु ॥ १॥

प्रजापते रोहिणीवेतु पत्नी। विश्वरूपा बृहती चित्रभानुः।

सा नो यज्ञस्य सुविते दधातु। यथा जीवेम शरदस्सवीराः।

रोहिणी देव्युदगात्पुरस्तात्। विश्वा रूपणि प्रतिमोदमाना।

प्रजापतिं हविषा वर्धयन्ती। प्रिया देवानामुपयातु यज्ञम् ॥ २॥

सोमो राजा मृगशीर्षेण आगन्। शिवं नक्षत्रं प्रियमस्य धाम।

आप्यायमानो बहुधा जनेषु। रेतः प्रजां यजमाने दधातु।

यत्ते नक्षत्रं मृगशीर्षमस्ति। प्रियं राजन् प्रियतमं प्रियाणाम्।

तस्मै ते सोम हविषा विधेम। शन्न एधि द्विपदे शं चतुष्पदे ॥ ३॥

आर्द्रया रुद्रः प्रथमा न एति। श्रेष्ठो देवानां पतिरघ्नियानाम्।

नक्षत्रमस्य हविषा विधेम। मा नः प्रजां रीरिषन्मोत वीरान्।

हेति रुद्रस्य परिणो वृणक्तु। आर्द्रा नक्षत्रं जुषतां हविर्नः।

प्रमुञ्चमानौ दुरितानि विश्वा। अपाघशं सन्नुदतामरातिम् ॥ ४॥

पुनर्नो देव्यदितिस्पृणोतु। पुनर्वसूनः पुनरेतां यज्ञम्।

पुनर्नो देवा अभियन्तु सर्वा। पुनः पुनर्वो हविषा यजामः।

एवा न देव्यदितिरनर्वा। विश्वस्य भर्त्री जगतः प्रतिष्ठा।

पुनर्वसू हविषा वर्धयन्ती। प्रियम् देवानामप्येतु पाथः ॥ ५॥

बृहस्पतिः प्रथमं जायमानः। तिष्यं नक्षत्रमभि संबभूव।

श्रेष्ठो देवानां पृतनासुजिष्णुः। दिशोऽनु सर्वा अभयत्रो अस्तु।

तिष्यः पुरस्तादुत मध्यतो नः। बृहस्पतिर्नः परिपातु पश्चात्।


बाधे॑तान्द्वेषो॑ अभयं॑ कृणु॒ताम्। सु॒वीर्य॑स्य॒ पतय॑स्याम ॥ ६ ॥
 इदं॑ सर्पे॒भ्यो ह॒विर॑स्तु जुष्टम्। आ॒श्रेषा॑ ये॒षामनु॑यन्ति॒ चेतः॑।
 ये अन्तरि॑क्षं पृथि॒वीं क्षि॑यन्ति। ते न॒स्सर्पा॑सो ह॒वमाग॑मिष्ठाः।
 ये रोच॑ने सूर्य॒स्यापि॑ सर्पाः। ये दि॒वं दे॒वीमनु॑सञ्चरन्ति।
 येष॑मश्रेषा अनु॒यन्ति॑ कामम्। तेभ्य॑स्सर्पे॒भ्यो मधु॑मञ्जुहोमि ॥ ७ ॥
 उप॑हृताः पि॒तरो॑ ये म॒घासु॑। मनो॑जवस॒स्सुकृ॑त॒स्सुकृ॑त्याः।
 ते नो॑ नक्ष॒त्रे ह॒वमाग॑मिष्ठाः। स्व॒धाभि॑र्यज्ञं प्र॒यतं॑ जुष॒न्ताम्।
 ये अग्नि॑दग्धा येऽन॒ग्निद॑ग्धाः। येऽमु॒ल्लोकं॑ पि॒तरः॑ क्षि॒यन्ति॑।
 याँश्च॑ वि॒द्मयाँ॑ उ च न प्र॒विद्म। म॒घासु॑ य॒ज्ञं सु॑कृतम् जुष॒न्ताम् ॥ ८ ॥
 गवां॑ पतिः॒ फल्गु॑नीनामसि॒ त्वम्। तद॑र्यमन् वरुणमि॒त्र चारु॑।
 तं त्वा॑ वयँ॒ सनि॑तारँ॒ सनी॑नाम्। जी॒वा जी॑वन्त॒मुप॑ संविशेम।
 येने॑मा विश्वा भु॒वनानि॑ सञ्जिता। यस्य॑ दे॒वा अनु॑संयन्ति॒ चेतः॑।
 अ॒र्यमा॑ राजाऽज॒रस्तु॑ विष्मन्। फल्गु॑नीनामृषभो॒ रोर॑वीति ॥ ९ ॥
 श्रेष्ठो॑ दे॒वानां॑ भगवो भगासि। तत्त्वा॑ वि॒दुः फल्गु॑नीस्तस्य॒ वित्तात्।
 अ॒स्मभ्यं॑ क्ष॒त्रम॑ज॒रँ सु॒वीर्य॑म्। गोम॑दश्व॒वदु॑प॒सन्नु॑देह।
 भगो॑ह दा॒ता भग॑ इत्प्रदा॒ता। भगो॑ दे॒वीः फल्गु॑नीरा॒विवेश॑।
 भग॑स्येत्तं प्र॒सवं॑ गमेम। यत्र॑ दे॒वैस्सध॑माद॒ मदे॑म ॥ १० ॥
 आया॑तु दे॒वस्स॑वि॒तोप॑यातु। हि॒रण्य॑येन सुवृ॒ता रथे॑न।
 वह॑न् ह॒स्तँ सु॑भगं वि॒द्मना॑प॒सम्। प्र॒यच्छ॑न्तं प॒पुरिं पु॑ण्यमच्छं।
 ह॒स्तः प्र॒यच्छ॑ त्वमृतं वसीयः। दक्षि॑णेन प्र॒तिगृ॑ष्णीम ए॒नत्।
 दा॒तार॑मद्य॒ सवि॑ता वि॒देया॑। यो नो॑ ह॒स्ताय॑ प्र॒सुवा॑ति॒ यज्ञ॑म् ॥११ ॥
 त्वष्टा॑ नक्ष॒त्रम॑भ्येति॒ चित्रा॑म्। सु॒भँ स॑संयु॒वतिँ॑ रोच॒माना॑म्।
 नि॒वेश॑यन्न॒मृता॑न्म॒र्त्याँश्च॑। रू॒पाणि॑ पि॒ँशन्॑ भु॒वनानि॑ विश्वा।
 तन्न॑स्त्वष्टा तदु॒ चित्रा॑ वि॒चष्टा॑म्। तन्न॑क्ष॒त्रं भू॑रि॒दा अ॑स्तु॒ मह्य॑म्।
 तन्नः॑ प्र॒जां वी॑र॒वतीँ॑ स॒नोतु॑। गोभि॑र्नो॒ अश्वै॑स्सम॒नक्तु॑ यज्ञ॑म् ॥ १२ ॥
 वा॒युर्न॑क्ष॒त्रम॑भ्येति॒ निष्ठा॑म्। ति॒ग्मशृ॑गो वृष॒भो रो॑रु॒वाणः॑।

समीरयन् भुवना मातरिश्वा। अप द्वेषार्थसे नुदतामरातीः।
तन्नो वायस्तदु निष्ठा शृणोतु। तन्नक्षत्रं भूरिदा अस्तु मह्यम्।
तन्नो देवासो अनुजानन्तु कामम्। यथा तरेम दुरितानि विश्वा ॥ १३ ॥
दूरमस्मच्छत्रवो यन्तु भीताः। तदिन्द्राग्नी कृणुतां तद्विशाखे।
तन्नो देवा अनुमदन्तु यज्ञम्। पश्चात् पुरस्तादभयन्नो अस्तु।
नक्षत्राणामधिपत्नी विशाखे। श्रेष्ठाविन्द्राग्नी भुवनस्य गोपौ।
विषूचशत्रूनपबाधमानौ। अपक्षुधन्नुदतामरातिम् ॥ १४ ॥
पूर्णा पश्चादुत पूर्णा पुरस्तात्। उन्मध्यतः पौर्णमासी जिगाय।
तस्या देवा अधिसंवसन्तः। उत्तमे नाक इह मादयन्ताम्।
पृथ्वी सुवर्चा युवतिः सजोषाः। पौर्णमास्युदगाच्छोभमाना।
आप्याययन्ती दुरितानि विश्वा। उरुं दुहां यजमानाय यज्ञम्।
ऋद्ध्यास्म हव्यैर्नमसोपसद्य। मित्रं देवं मित्रधेयं नो अस्तु।
अनूराधान् हविषा वर्धयन्तः। शतं जीवेम शरदः सर्वीराः।
चित्रं नक्षत्रमुदगात्पुरस्तात्। अनूराधा स इति यद्वदन्ति।
तन्मित्र एति पथिभिर्देवयानैः। हिरण्ययैर्विततैरन्तरिक्षे ॥ १६ ॥
इन्द्रो ज्येष्ठामनु नक्षत्रमेति। यस्मिन् वृत्रं वृत्र तूयो ततार।
तस्मिन्वयममृतं दुहानाः। क्षुधन्तरेम दुरितिं दुरिष्टिम्।
पुरन्दराय वृषभाय धृष्णवे। अषाढाय सहमानाय मीढुषे।
इन्द्राय ज्येष्ठा मधुमद्दुहाना। उरुं कृणोतु यजमानाय लोकम् ॥ १७ ॥
मूलं प्रजां वीरवतीं विदेय। पराच्येतु निर्ऋतिः पराचा।
गोभिर्नक्षत्रं पशुभिस्समक्तम्। अहर्भूयाद्यजमानाय मह्यम्।
अहर्नो अद्य सुविते ददातु। मूलं नक्षत्रमिति यद्वदन्ति।
पराचीं वाचा निर्ऋतिं नुदामि। शिवं प्रजयै शिवमस्तु मह्यम् ॥ १८ ॥
या दिव्या आपः पयसा सम्बभूवुः। या अन्तरिक्ष उत पार्थिवीर्याः।
यासामषाढा अनुयन्ति कामम्। ता न आपः शꣳ स्योना भवन्तु।
याश्च कूप्या याश्च नाद्यास्समुद्रियाः। याश्च वैशन्तीरुत प्रासचीर्याः।

यासांमषाढा मधु भक्षयन्ति। ता न आपः शꣳ स्योना भवन्तु ॥१९ ॥
तन्नो विश्वे उप शृण्वन्तु देवाः। तदषाढा अभिसंयन्तु यज्ञम्।
तन्नक्षत्रं प्रथतां पशुभ्यः। कृषिर्वृष्टिर्यजमानाय कल्पताम्।
शुभ्राः कन्या युवतयस्सुपेशसः। कर्मकृतस्सुकृतो वीर्यावतीः।
विश्वान् देवान् हविषा वर्धयन्तीः। अषाढाः काममुपायन्तु यज्ञम् ॥ २० ॥
यस्मिन् ब्रह्माभ्यजयत्सर्वमेतत्। अमुञ्च लोकमिदमूच सर्वम्।
तन्नो नक्षत्रमभिजिद्विजित्य। श्रियं दधात्वहणीयमानम्।
उभौ लोकौ ब्रह्मणा सञ्जितेभौ। तन्नो नक्षत्रमभिजिद्विचष्टाम्।
तस्मिन्वयं पृतनास्सञ्जयेम। तन्नो देवासो अनुजानन्तु कामम् ॥ २१ ॥
शृण्वन्ति श्रोणाममृतस्य गोपाम्। पुण्यामस्या उपशृणोमि वाचम्।
महीं देवीं विष्णुपत्नीमजूर्याम्। प्रतीची मेनाꣳ हविषा यजामः।
त्रेधा विष्णुरुरुगायो विचक्रमे। महीं दिवं पृथिवीमन्तरिक्षम्।
तच्छोणैतिश्रव इच्छमाना। पुण्यꣳ श्लोकं यजमानाय कृण्वती ॥ २२ ॥
अष्टौ देवा वसवस्सोम्यासः। चतस्रो देवीरजराः श्रविष्ठाः।
ते यज्ञं पान्तु रजसः पुरस्तात्। संवत्सरीणममृतꣳस्वस्ति।
यज्ञं नः पान्तु वसवः पुरस्तात्। दक्षिणतोऽभियन्तु श्रविष्ठाः।
पुण्यन्नक्षत्रमभि संविशाम। मा नो अरातिरघशꣳसाऽगन् ॥ २३ ॥
क्षत्रस्य राजा वरुणोऽधिराजः। नक्षत्राणाꣳ शतभिषग्वसिष्ठः।
तौ देवेभ्यः कृणुति दीर्घमायुः। शतꣳ सहस्रा भेषजानि धत्तः।
यज्ञन्नो राजा वरुण उपयातु। तन्नो विश्वे अभि संयन्तु देवाः।
तन्नो नक्षत्रꣳ शतभिषगजुषाणम्। दीर्घमायुः प्रतिरद्वेषजानि ॥ २४ ॥
अज एकपादुदगात्पुरस्तात्। विश्वा भूतानि प्रति मोदमानः।
तस्य देवाः प्रसवं यन्ति सर्वे। प्रोष्ठपदासो अमृतस्य गोपाः।
विभ्राजमानस्समिधा न उग्रः। आऽन्तरिक्षमरुहदगन्द्याम्।
तꣳ सूर्यं देवमजमेकपादम्। प्रोष्ठपदासो अनुयन्ति सर्वे ॥ २५ ॥
अहिर्बुध्नियः प्रथमा न एति। श्रेष्ठो देवानामुत मानुषाणाम्।

तं ब्राह्मणास्सोमपास्सोम्यासः। प्रोष्ठपदासो अभिरक्षन्ति सर्वे।
चत्वार एकमभि कर्म देवाः। प्रोष्ठपदा स इति यान् वदन्ति।
ते बुध्नियं परिषद्यं स्तुवन्तः। अहिं रक्षन्ति नमसोपसद्य ॥ २६ ॥
पूषा रेवत्यन्वेति पन्थाम्। पुष्टिपती पशुपा वाजबस्त्यौ।
इमानि हव्या प्रयता जुषाणा। सुगैर्नो यानैरुपयातां यज्ञम्।
क्षुद्रान् पशून् रक्षतु रेवती नः। गावो नो अश्वाँ अन्वेतु पूषा।
अन्नँ रक्षन्तौ बहुदा विरूपम्। वाजँ सनुतां यजमानाय यज्ञम् ॥ २७ ॥
तदश्विनावश्वयुजोपयाताम्। शुभङ्गमिष्टौ सुयमेभिरश्वैः।
स्वं नक्षत्रं हविषा यजन्तौ। मध्वासम्पृक्तौ यजुषा समक्तौ।
यो देवानां भिषजौ हव्यवाहौ। विश्वस्य दूतवमृतस्य गोपौ।
तौ नक्षत्रं जुजुषाणोपयाताम्। नमोऽश्विभ्यां कृणुमोऽश्वयुग्भ्याम् ॥ २८ ॥
अप पाप्मानं भरणीर्भरन्तु। तद्यमो राजा भगवान् विचष्टाम्।
लोकस्य राजा महतो महान् हि। सुगं नः पन्थामभयं कृणोतु।
यस्मिन्नक्षत्रे यम एति राजा। यस्मिन्नेनमभ्यषिचन्त देवाः।
तदस्य चित्रं हविषा यजाम। अप पाप्मानं भरणीर्भरन्तु ॥ २९ ॥
निवेशनी सङ्गमनी वसूनां विश्वा रूपाणि वसून्यावेशयन्ती।
सहस्रपोषं सुभगा रराणा सा न आगन्वचसा संविदाना॥
यत्ते देवा अदधुर्भागधेयममावास्ये संवसन्तो महित्वा।
सा नो यज्ञं पिपृहि विश्ववारे रयिन्नो धेहि सुभगे सुवीरम्।
ॐ शान्तिः शान्तिः शान्तिः

Encoded with Accents by Rajagopal Iyer rajsand@yahoo.com

——
Please send corrections to sanskrit@cheerful.com

